

歐陽文忠全集

冊七

外集卷第三

集五十三

古詩三

南獠

洪宋區夏廣恢張際四維狂孽久不聳民物含一作涵春熙耆稚適
所尙游泳光華時遽然攝提歲南獠掠邊陲予因叩村叟此事曷如
斯初似却人問未語先涕垂收涕謝客問爲客陳始基撫水有上源
水淺山嶮巖生民三千室聚此天一涯狼勇復輕脫性若鹿與麋男
夫不耕鑿刀兵動相隨宜融兩境上殺人取其貲因斯久久來此寇
易爲羈鼠竊及蟻聚近裏焉敢窺勢亦不久住官軍來卽馳景德祥
符後時移事亦移四輔哲且善天子仁又慈將軍稱招安兵非羽林
兒龍江一牧拙邏騎材亦非威惠不兼深徒以官力欺智略仍復短
從此難羈縻引兵卸甲嶺部陣自參差鋒鏑殊未接士卒心先離奔
走六吏死初在懷遠軍卸甲嶺殺傷范禮賓王崇班等六人落陣死

明知國挫威自茲賊聲震直寇融州涪縣宇及民廬燬蕩無孑遺利
鏃淬諸毒中膚無藥醫長刀斷人股橫屍滿通達婦人及孳產驅負
足始歸堂堂過城戍何人敢正窺外計削奏疏一一聞宸闈赫爾天
斯怒選將興王師精甲二萬餘猛毅如虎貔劍戟凜秋霜旌檠閃朝
曦八營與七萃豈得多于茲外統三路進小敵胡能爲前驅已壓境
後軍猶未知逶迤至蠻域但見空稻畦搜羅一月餘不戰帥自罷荷
戈莫言苦負糧探可悲哀哉都督郵無辜遭屠糜昭州都曹皇甫僅
三人部糧入洞遭蠻賊掩殺及害夫力千餘曉昨計不出還出招安
辭半降半來拒蠻意猶狐疑厚以繒錦贈徂心詐爲卑戎帳草草起
賊戈躡背揮我聆老叟言不覺顰雙眉吮毫兼疊簡占作南獠詩願
值采詩官數于彤墀

寄聖俞

西陵山水天下佳我昔謫官君所嗟官閑憔悴一病叟縣古瀟灑如

山家雪消深林自斷一作斲筍人響空山隨摘茶有時攜酒探幽絕
往往上下窮煙霞蔭蔭綠緣緲軟可藉野卉青紅春自華風餘落葉飛
面旋日暖山鳥鳴交加貪追時俗翫歲月不覺萬里留天涯今來寂
寞西岡口秋盡不見東籬花市亭插旗鬪新酒十千得斗不可賒材
非世用自當去一舸聲牙揮釣車君能先往勿自滯行矣春洲生荻
芽

答梅聖俞寺丞見寄

憶昔識君初我少君方壯風期一相許意氣曾誰讓交游盛京洛鍾
俎陪丞相驥驥日相追鸞鳳志高颺詞章盡崔蔡論議皆歆向文會
忝予盟詩壇推予將談精鋒愈出飲劇歡無量賈勇爲無前餘光誰
敢望茲年五六歲人事堪悽愴南北頓睽乖相離獨飄蕩失杯由晝
足傷手因代匠移書雖激切拙語非欺誑安知乃心愚而使所言妄
權豪不自避斧質誠爲當蒼皇得一邑奔走踰千嶂楚峽聽猿鳴荆

江畏蛟浪蠻方異時俗景物殊氣象綠髮變風霜丹顏侵疾痒常憂
鵬鳥窺幸免江魚壘今茲荷寬宥遷徙來漢上憔悴戴囚冠驅馳嗟
俗狀王事多倥偬學業差遺忘未能解綬去所戀寸祿養舉足畏逢
仇低頭惟避謗忤聞故人近豈憚驅車訪一別各衰翁相見問無恙
交情宛如舊歡意獨能強幸陪主人賢更值芳洲漲菱荷亂浮泛水
竹涵虛曠清風滿談席明月臨歌舫已見洛陽人重聞畫樓唱怡然
壹鬱寫慙爾累囚放自從還邑來會此驕陽亢神靈多請禱租訟煩
笞撻猶須新秋涼漢水臨一作瀉清漾野稼蕩浮雲晴山開疊障聊
以助吟詠亦可資酣暢北轅如未駕幸子能來貺

酬聖俞朔風見寄

因君朔風句令我苦寒吟離別時未幾崢嶸歲再陰驚飈擊曠野餘
響入空林客路行役遠馬蹄冰雪深瞻言洛中舊期我高陽吟故館
哭知己新年傷客心相逢豈能飲惟有涕沾襟

送琴僧知白

吾聞夷中琴已久常恐老死無其傳夷中未識不得見豈謂今逢知
白彈遺音髣髴尚可愛何況之子傳其全孤禽曉警秋野露空澗夜
落春崑泉二年遷謫寓三峽江流無底山侵天登臨探賞久不厭每
欲圖畫存於前豈知山高水深意久以寫此朱絲絃酒酣耳熱神氣
王聽之爲子心肅然嵩陽山高雪二尺有客擁鼻吟苦寒負琴北走
乞其贈持我此句爲之先

聽平戎操

西戎負固稽天誅勇夫戰死智士謨上人知白何爲者年少力壯逃
浮屠自言平戎有古操抱琴欲進爲我娛我材不足置廊廟力弱又
不堪戈矛遭時有事獨無用偷安飽食與汝俱爾知平戎競何事自
古無不由吾儒周宣六月伐獫狁漢武五道征匈奴方叔召虎乃真
將衛青去病馘區區建功立業當威日後世稱詠於詩書平生又欲

慕賈誼長纓直請繫單于當衡理檢四面啓有策不獻空踟躕慚君
爲我奏此曲聽之空使壯士吁推琴置一作耽酒恍若失誰謂子琴
能起予

書宣城修水渠記後奉呈朱寺丞

因民之利無難爲使民以說民忘疲樂哉朱君鄭靈堤導鄣及蠻興
衆陂古渠廢久人莫知朱君三月而復之沃土如膏瘠土肥百里歲
歲無凶蓄一作災鄣蠻之水流不止襄人思君無時已

谷正至始得先所寄書及詩不勝喜慰因書數韻奉酬聖俞
寒日照深巷柴門朝尚閉有客自江來尺書千里至啓書復何云但
言南北異南方地常暖風物稱佳麗梅蘼入新年蘭草動芳氣樂哉
登臨興豈厭江湖滯伊予方寂寞刻苦窮文字萬國會王州羣英馳
備軌方朔常苦餓子雲非官意歲暮慘風塵官閑倦朝市出處一云
別所思寧可冀春江有歸鴈但使音書繼

答梅聖俞

寒日照窮巷荆扉晨未開驚聞遠方信有客渡江來開緘復何喜宛
若見瓊瑰一爾乖出處未嘗持酒盃官閑隱朝市歲暮慘風埃音書
日可待春鴈暖應回

病中聞梅二南歸

聞君解舟去秋水正沄沄野岸曠歸思都門辭世紛稍逐商帆伴初
隨征鴈羣山多淮甸出柳盡汴河分楚色蕪尚一作上綠江烟日半
一作畔曛客意浩已遠離懷寧復云宣城好風月歸信幾時聞

送蟾上人遊天台

昔年在伊洛林壑每相從對掃竹下榻坐思湖上峯自言伊洛波每
起滄洲憶今茲道行遊千里東南國都門汴河上柳色入青烟流水
向淮浦歸人隨越船東南遍林嶺萬壑新流滿小桂綠應芳江春行
已晚藹藹赤城陰依依識古岑一去誰復見石橋雲霧深

送徐生秀州法曹

一笑暫相從結交方恨晚猶茲簿領困况爾東南遠落帆淮口暮採石江洲暖黃鵠可寄書惟嗟雙翅短

讀山海經圖

夏鼎象九州山經有遺載空濛大荒中杳靄羣山會炎海積歊蒸陰幽異明晦奔趨各異種倏忽俄萬態羣倫固殊稟至理寧一槩駭者自云驚生兮孰知怪未能識造化但爾披圖繪不有萬物殊豈知方輿大

依韻和聖俞見寄

與君結交深相濟同水火文章發春葩節行凜筠筍吾才已愧君子齒又先我君惡予所非我許子云可厭趣共乖時畏塗難轉轅道肥家所窮身老志彌果每嗟游從異有甚樊籠鑠天匠染青紅花腰呈裊娜苟能杯酌同直待冠巾墮無欺校讎貧鹽米尙餘顆

晏太尉西園賀雪歌

陰陽乖錯亂五行窮冬山谷暖不冰一陽且出在地上地下誰發萬
物萌太陰當用不用事蓋由姦將不斬虧國刑遂令邪風伺間隙潛
中瘟疫於疫氓神哉陛下至仁聖憂勤懇禱通精誠聖人與天同一
體意未發口天已聽忽收寒威還水官正時肅物凜以清寒風得勢
獵獵走瓦乾霰急落不停恍然天地半夜白羣雞失曉不及鳴清晨
拜表東上閣鬱鬱瑞氣盈宮庭退朝騎馬下銀闕馬滑不慣行瑤瓊
晚趨賓館賀太尉坐覺滿路流歡聲便開西園掃徑步正見玉樹花
凋零小軒却坐對山石拂拂酒面紅烟生主人與國共休戚不惟喜
悅將豐登須憐鐵甲冷徹骨四十餘萬屯邊兵

送吳照鄰還江南

霜前江水磨碧銅岸背菱葉翹青蟲吳郎鬢絲生幾縷不羞月上扶
桑東羞見清波照人景去時黑髮吹春風五年歸來婦應喜從此不

問西飛鴻

珍傲朱版印

答朱案捕蝗詩

捕蝗之術世所非欲究此語興於誰或云豐凶歲有數天孽未可人力支或言蝗多不易捕驅民入野踐其畦因之姦吏恣貪擾戶到頭斂無一遺蝗災食苗民自苦吏虐民苗皆被之吾嗟此語祇知一不究其本論其皮驅雖不盡勝養患昔人固已決不疑秉蠹投火况舊法古之去惡猶如斯既多而捕誠未易其失安在常由遲誹誹最說子孫衆爲腹所孕多蛄蛄始生朝畝暮已頃化一爲百無根涯口含鋒刃疾風雨毒腸不滿疑常飢高原下濕不知數進退整若隨金聲嗟茲羽孽物共惡不知造化其誰尸大凡萬事悉如此禍當早絕防其微蠅頭出土不急捕羽翼已就功難施只驚羣飛自天下不究生子由山陂官書立法空太峻吏愚畏罰反自欺蓋藏十不敢申一上心雖惻何由知不如寬法擇良令告蝗不隱捕以時今苗因捕雖踐

死明歲猶免爲蜾蠃吾嘗捕蝗見其事較以利害曾深思官錢二十
買一斗示一作亦以明信民爭馳斂微成衆在人力頃刻露積如京
坻乃知孽蟲雖甚衆嫉惡苟銳無難爲往時姚崇用此議誠哉賢相
得所宜因吟君贈廣其說爲我持之告採詩

答蘇子美離京見寄

衆奇子美貌堂堂千人英我獨疑其胸浩浩包滄溟滄溟產龍蜃百
怪不可名是以子美辭吐出人輒驚其於詩最豪奔放何縱橫衆絃
排律呂金石次第鳴間以險絕句非時震雷霆兩耳不及掩百病爲
之醒語言既可駭筆墨尤其精少雖嘗力學老乃若天成濡毫弄點
畫信手不自停端莊雜醜怪羣星見機槍爛然溢紙幅視久無定形
使我終老學得一已足矜而君兼衆美磊落猶自輕高冠出人上誰
敢揖其膺羣臣列丹墀幾位缺公卿使之東帶立可以重朝廷况令
參國議高論吐崢嶸惜哉三十五白髮今已生近者去江淮作詩寄

離情口誦不及寫一日傳都城退之序百物其鳴由不平天方苦君
心欲使發其聲嗟我非鸞驚徒思和嚶嚶因風幸數寄警我聲與盲
立秋有感寄蘇子美

庭樹忽改色秋風動其枝物情未必爾我意先已悽雖恐芳節謝猶
忻早涼歸起步雲月暗顧瞻星斗移四時有大信萬物誰與期故人
在千里歲月令我悲所嗟事業晚豈惜顏色衰廟謀今謂何胡馬日
以肥

喜雪示徐生

清穹一作空凍冬威旱野渴天澤經旬三尺雪萬物變顏色愁雲噓
不開慘慘連日夕寒風借天勢豪忽肆陵轢空枝凍鳥雀凝不避彈
弋長河寂無聲厚地若龜坼陰階夜自照缺瓦屢復積貯潔瑩冰壺
量深埋玉尺凝陰反翳剌陽九兆初晝春回百草心氣動黃泉脉堅
冰雖未破土潤已潛釋常聞老農語一臘見三白是爲豐年候占驗

勝著策天兵血西陲萬轍走供億嗟子媿疲俗奚術肥爾瘠惟幸歲
之穰茲惠豈人力非徒給租調且可銷盜賊從今潔黼廩期共飽甦
麥

賦竹上甘露

稍稍兩竹枝甘露葉間垂草木有靈液陰陽疑以時深山與窮谷往
往嘗有之幸當君子軒得爲衆人知物生隨所託晦顯各有宜聊以
助歌詠兼堪飲童兒

和對雪憶梅花

昔官西凌江峽間野花紅紫多爛斑惟有寒梅舊所識異鄉每見心
一作必依然爲憐花自洛中看花上蜀鳥啼綿蠻當時作詩誰唱和
粉藥自折清香繁今來把酒對殘雪却憶江上高樓山羣花四時媚
者衆何獨此樹令人攀窮冬萬木立枯死玉豔獨發陵清寒鮮妍皎
如鏡裏面綽約對若風中仙惜哉北地無此樹霰雪漫漫平沙川徐

生隨我客此郡冰霜旅舍逢新年憶花對雪晨起坐清詩寶鐵裁琅玕長河風色暖將動卽看綠柳含春烟寒齋寂寞何以慰卯盃且醉酣午眠

歸鴈亭

荒蹊臘雪春尙埋我初獨與徐生來城高樹古禽鳥野聲響格磔寒
毯毳頽垣敗屋巍然在略可遠眺臨傾臺高株唯有柳數十夾路對
立初誰栽漸誅榛莽辨草樹頗有桃李當墻隈欣然便擬趁時節斤
鋤日夕勞耘培新年風色日漸好晴天仰見鴈已回枯根老脈凍不
發遶之百匝空徘徊頑姿野態煩造化勾芒不肯先煦吹酒酣幾欲
搗大鼓驚起龍蟄驅春雷偶然不到才數日顏色一變由誰催翠芽
紅粒迸條出纖趺嫩萼如剪裁臥槎燒桺亦強發老朽不避衆艷怡
姍然山杏開最早其餘紅白各自媒初開盛發與零落皆有意思牽
人懷衆芳勿使一時發當令一落續一開畢春應須酒萬斛與子共

醉三千盃

送韓子華

嗟我久不見韓子如讀古書思古人忽然相逢又數日笑語反不共
一罇諫垣尸居職業廢朝事汲汲勞精神子華筆力天馬足驚駘千
百誰可羣嗟予老鈍不自笑尙欲疾走追其塵子華有時高談駭我
聽榮枯萬物移秋春所以不見令我思見之如飲玉醴醇叩門下馬
忽來別高帆得風披飛雲離懷有酒不及寫別後慰我寓於文

送李太傅知冀州端懿

吾慕李漢超爲將勇無儔養士三千人人百貌貅關南三十年天
子不北憂吾愛李尤則善覘多計籌虜動靜寢食皎如在雙眸出入
若變化談笑摧敵謀恩信浹南北聲名落燕幽二公材各異戰守兩
堪尤天下不用兵爾來三十秋今其繼者誰守冀得李侯李侯年尙
少文武學彬彬河朔一尺雪北風煖貂裘上馬擘一作臂長弓白羽

飛金鏤臨行問我言我慚本儒鯁漢超雖已久故來尙歌謳允則事
最近猶能想風流將此聊爲贈勉哉行無留

石篆詩并序

某啓近蒙朝恩守此州州之西南有瑯琊山唐李幼卿庶子泉者某
在館閣時方國家詔天下求古碑石之文集于閣下因得見李陽冰
篆庶子泉銘學篆者云陽冰之迹多矣無如此銘者常欲求其本而
不得于今十年矣及此來已獲焉而銘石之側又陽冰別篆十餘字
尤奇於銘文世罕傳焉山僧惠覺指以示予予徘徊其下久之不能
去山之奇迹古今紀述詳矣而獨遺此字予甚惜之欲有所述而患
文字之不稱思予嘗愛其文而不及者梅聖俞蘇子美也因爲詩一
首并封題墨本以寄二君乞詩刻于石

寒崑飛流一作洒落青苔旁斲石篆何奇哉其人已死骨已朽此字

不滅留山隈山中老僧憂石泐印之以紙磨松煤欲令留傳在人世